

《衛風·淇奧》

《毛詩序》：

淇奧。美武公之德也。有文章。又能聽其規諫。以禮自防。故能入相于周。美而作是詩也。

原文：

瞻彼淇奧。綠竹猗猗。

有匪君子。如切如磋。如琢如磨。瑟兮僩兮。赫兮咺兮。有匪君子。終不可諼兮。

瞻彼淇奧。綠竹青青。

有匪君子。充耳琇瑩。會弁如星。瑟兮僩兮。赫兮咺兮。有匪君子。終不可諼兮。

瞻彼淇奧。綠竹如簣。

有匪君子。如金如錫。如圭如璧。寬兮綽兮。倚重較兮。善戲謔兮。不為虐兮。

淇奧 三章 章九句